

編號 01 號

【 屨水扭魚 】 郭亭好原作

阿宏哥從細都係莊肚个搞頭王，毋管係拈蛇打蜈、屨水扭魚仔抑係起窯暗番薯、打鳥仔、灌土狗仔，麼个戲齣佢都曉變，佢等這兜細孺仔，聚概蓋好跔等佢滿山滿坪一哪仔搞、一哪仔寮。

有一年堵著做天旱，莊尾該條河壩水硬硬會燥核吔，阿宏哥就邀佢等共下去河壩屨水扭魚仔，大家聽著又有好搞个，暢到奈毋得，遽啊歸去屋下款傢伙，有个人拿錫桶、面盆，有个人拿瓠杓、撈杯仔¹，阿宏哥自家拿一支大撩鏟，歸陣細人仔就擱等傢伙磬磬鏘鏘²行對河壩去。

一到河壩，阿宏哥就用大撩鏟耙出一條水路，同水旱走³開始擱水窟。水窟擱好吔大家就拿等面盆仔、瓠杓，同窟肚个水屨出去。阿明毋知別試⁴抑係無堵好，一面盆个水屨啊出去，嘎屨著行對厥面前過个阿傑，害佢歸身仔浴溼，連目珠都擘毋開，阿傑譴腔腔仔⁵搭纏拳頭嫵想愛過去搵⁶阿明，阿宏哥看著就遽啊行兼同阿

傑擱開，講阿明毋係別試个莫譴啦！過喊阿明同阿傑會失禮，阿明蓋有誠意頭那緊領緊會失禮，阿傑就無恁譴吔，應講：「好啦！無要緊啦！這下天時恁熱，恁仔乜過涼啦！」就恁仔，大家又過嘻嘻哈哈歡喜屨水吔。

天頂个日頭恁箭日⁷，每一個人汗流脈落，等水屨燥該下看著緊透緊跳个山鱧、石貼、白哥仔、石斑、蝦公這兜，大家聚概暢壞吔！阿旺過細隻，還毋識屨水扭魚仔過，這擺分佢看著有恁多魚仔、蝦公好扭，暢啊緊喊緊颯，無堵好嘎去躡著有溜苔个石頭，橫啊四腳惹天，連褲襠底都濕核，原旦佢暢啊噉噉滾⁸，這下嘎噉到哇哇滾，大家看著也噉啊砣砣滾，喊佢愛過細義啊。

大家憑兼來十手八腳開始扭魚仔、拈蝦公。蝦公大約勢會屏在石頭下，佢等就緊搨石頭緊扭，係還有屨毋躁个細水窟，就愛用撈杯仔去撈，毋過上游水又會緊流過來，大家緊扭魚仔又還愛緊屨水，就恁仔大家搞啊歡喜弄天無想愛歸。

會暗吔！阿宏哥喊大家同東西收擘，過同今晡日所有扭著个魚仔並蝦公平分大家，有好搞又有好拿，每一個人聚概都蓋暢，緊講天光日還愛再來。恁多年過去吔！到今佢還記得還細時節个該條河壩，同共下屨水扭魚仔个細人仔伴。

¹ 撈杯仔：音 leu^ˇ bi^ˊ e^ˋ；捉魚蝦或昆蟲的長柄網具。

² 磬磬鏘鏘：音 kin kin kiang kiang；東西碰撞的聲音。

³ 同水旱走：音 tung^ˇ sui^ˋ hon^ˊ zeu^ˋ；將水引走。

⁴ 別試：音 ti sii；故意。

⁵ 譴腔腔仔：音 kien^ˋ zii^ˊ zii^ˊ e^ˊ；非常生氣的樣子。

⁶ 搵：音 zem^ˊ；握緊拳頭揍人的樣子。

⁷ 箭日：音 jien ngid^ˋ；陽光直射的樣子。

⁸ 噉噉滾：音 gi gi gun^ˋ；叫個不同。

編號 02 號

【外阿婆屋下个細日頭】徐維莉原作

寒天一到，刺骨个冷風帶等利利个刀仔，一路咻咻滾削等過，過路人驚到激激顛踇等行，圓身項加等大襖、頭那頂戴等帽仔、手項落等手落仔，鼻公同嘴還用嘴措仔措塞塞，凧流凧竄就驚兩隻耳公一無細義會寒到敝¹下來。「10」度！正式盡冷喔！同學講愛湊伴共下去食爐²，阿爸講愛去買一鑊薑嫲鴨，大家就驚冷風鑽入背囊心，係凍著該就大條咗！毋過，佢最想去个係外阿婆屋下，因為該位有燒暖个細日頭。

上禮拜，佢等一屋下人共下歸山項阿婆屋下，一下車看著阿公在禾埕項拿等斧頭在該破樵，阿婆在該團草結。佢大大聲喊：「阿公、阿婆，佢等歸來咗！」阿公笑咪咪仔應講：「歸來咗麼³？好好好！莫行兼，先入屋去奈。」阿婆看著細老妹共快同手落仔脫下來，手伸長長嗆等講：「來來來，阿婆捕！阿婆捕！」阿爸阿姆左手拿右手攔無閒直掣。佢礮礮舂舂走等去灶下尋佢个細日頭，該就係阿婆屋下暖水个大灶頭。毋過，這時細日頭冷泔泔

仔⁴還無醒，佢愛共快分佢燒暖喊佢疏床，因為佢愛用這粒細日頭煮一鑊燒暖个洗身水分大家洗身。

佢先同大鑊个水裝滿，過來坐到灶仔前个矮樹樁項，拿一結壁脣个草結用捽來火點分佢著，細細个火星仔一下仔就著起來，佢共快同佢窿入灶空項，續等架三、四支个竹筒⁵入去，拿火燒筒煞猛个歎，歎到面紅紅火猛猛汗流脈落，火猛到掀出來！阿公行過來同頸根項个手帕仔拿下來同佢捽汗，佢嗆講：「又毋係愛劇豬仔，水煮到拋拋滾，恁浪核樵！」佢講香絲樹同九芎過耐炆⁶，窿兩支入去等佢定定仔燒就好，佢掌等這粒細日頭，暗夜中一陣一陣沖⁷上去个係香絲樹个香也係九芎个味，煙囪唱出一句一句个燒暖，星仔同山風也細細聲仔跔等和！

這個大灶頭對阿太手仔用到今，佢毋單只做得暖洗身水，連炕衫褲、炒番豆、焗雞鴨、燜筍干、暗番薯這兜事頭佢聚概也會，實在有壁有風神！對佢來講佢就係阿婆屋下个細日頭，係最香最好搞个所在，佢有燒暖个細日頭，「寒天，有麼个好驚？做佢去就好！」

¹ 敝：音 lod`；脫落。

² 爐：音 lu`；火鍋。

³ 麼：音 me`；疑問詞「嗎」。

⁴ 冷泔泔仔：音 lang` vad` vad` e`；冷冷的、涼涼的。

⁵ 竹筒：音 zug` tung`；將竹橫截成段，節與節間的中空部分。

⁶ 炆：音 vun`；燜燒。

⁷ 沖上去：音 cung song` hi；向上直飛。